

# Die goldisch Flerschemer Fassenacht

Om Sunndaach noochmiddach war de Fassenachtszug erum – der iwwerichens unne in de Hauptstrooß nit gonz so verroppt war wie sunst - unn uff oomol hosde zugucke kenne, wie de Hochnewwel fortgezooche iss unn die Sunn korz vorm Abtauche nochemol erauskumme iss. Weil dess scheene Wetter, wasse uns im Fernseh moins versproche hadde war middaachs uff oomol fort, unn ohne die Sunn, die om Fassenachtssomsdaach noch so schee geschiene hott, isses gonz schee kalt gewese beim Hall-die-Gail uff de Gass odder uffem Balkon.

Villeicht warn die, die ferr de gonze Daach Sunneschoi versproche hadde, nor die zweit Garnidur von de Wedderfresch, genau wie die, die die Flerschemer Fassenachtsitzung ins Bild gesetzt hadde, die zweit Garnidur vom Dritte Programm gewese soi muss. Weil die Aktive in de Sitzung warn mehr Profis als die, die se uns iwwer de Bildschirm eriwwerbrenge wolde. Dess kann aach nit onnerst soi, wenn die Reschiseurin, wie ich gelese habb, koo Fassenachtern iss. Ess nächsde Mol solle die oo schicke die dess besser kann odder die solle dess de FCV selwer mache losse, die kriehns besser hie.

Weil je länger die Sitzung gedauert hott umso mehr hott merr nemlich beim Gucke dess Gefiehl gehabt, als det doo oo sitze unn det uff die Uhr gucke, nor dass die Sitzung pinktlich ferdich werdd, als obses nit abwarde kennt, noochher noch ooner drinke ze geh. Josses naa, so e Sitzung, wenn se aach Fit for Fun gehaaße hott, iss doch koon Longstreckelaaf, wos um die Zeit geht. Naa, merr muss de Zuschauer aach emol e bisje Zeit gewwe Luft ze holle, unn wie kann merr dess besser, als wenn die Kamera aach emol e Weil uffem scheene odder intressonde Gesicht stehe bleibt. Die hawwe monchmol so schnell geschwenkt wie enn Oofänger mett soine Vidio-Kamera, die der on Weihnachte geschenkt kriecht hott, der alles druffkriehe will unn om End nix zeicht. Dann solle se halt beim nechste Mol e halb Stund dezu gewwe. Weil merr det sich werklich emol gern die Leit oogucke, die hinne Saal sinn unn nit nor die die vorne hocke weisse immer vorne hocke.

Unn dass dem Margittche Sponheimer ihr Lied vom Rosemondaach gesunge worrn iss unn nit dess Flerschemer Lied, dess muss mir mol ooner erklärn. Mir sinn in Flerschem unn nit in Meenz. Wär dess nix, widder mol e richdich gut Melodie unn enn richdich gude Text selwer ze mache unn den von Flerschemer Sänger singe ze losse? Unn nit nor alls die Lieder von de Meenzer odder Kölner Fassenachtsasse umzetexte?

Ich hoff nor, dass de Holzmichel bald sterbt, awwer uijuijuijuijui auauauau dess kann noch long dauern. Awwer die Flerschemer Fassenacht, die aach ferr uns Ältere mol goldisch gewese iss, doomols im Schitzehof odder in de ahl Tornhall, werdd aach de Michel iwwerlewe.

Eiern Honnes